

Na osnovu člana 53. Zakona o mikrokreditnim organizacijama ("Službene novine Federacije BiH", broj 59/06), člana 4., 9. i 25. Zakona o Agenciji za bankarstvo Federacije BiH ("Službene novine Federacije BiH", broj 9/96, 27/98, 20/00, 45/00, 58/02, 13/03, 19/03, 47/06 i 59/06) i člana 18. Statuta Agencije za bankarstvo Federacije BiH ("Službene novine Federacije BiH", broj 42/04), Upravni odbor Agencije za bankarstvo Federacije BiH, na sjednici održanoj 14. marta 2007. godine, donosi

ODLUKU

O UVJETIMA I POSTUPKU ZA IZDAVANJE DOZVOLE ZA RAD MIKROKREDITNOJ FONDACIJI NASTALOJ PROMJENOM OBLIKA MIKROKREDITNE ORGANIZACIJE

I. OPĆE ODREDBE

Član 1.

Ovom Odlukom Agencija za bankarstvo Federacije BiH (u daljnjem tekstu: FBA) definiše opće uvjete i postupak izdavanja dozvole za obavljanje poslova davanja mikrokredita (u daljnjem tekstu: dozvola za rad) mikrokreditnoj fondaciji (u daljnjem tekstu: MKF), nastaloj promjenom pravnog oblika i organizovanjem mikrokreditne organizacije registrovane u skladu sa Zakonom o mikrokreditnim organizacijama ("Službene novine Federacije BiH", broj 24/00) (u daljnjem tekstu: postojeća MKO).

II. IZDAVANJE DOZVOLE ZA RAD

Član 2.

Postojeća MKO prilikom promjene pravnog oblika i organizovanja u MKF podnosi FBA zahtjev za izdavanje dozvole za rad MKF i uz njega dostavlja:

1. ovlaštenje za lice sa kojim će FBA saradivati u postupku razmatranja zahtjeva za izdavanje dozvole,
2. registraciju postojeće MKO kod nadležnog ministarstva,
3. listu svih registrovanih osnivača postojeće MKO, sa naznakom osnivača koji su uplatili novčana sredstva za njeno osnivanje uz dokaze o iznosu uplate novčanih sredstava,
4. pregled strukture nenominiranog kapitala postojeće MKO (donacije, višak prihoda nad rashodima i drugi izvori), potpisan od ovlašćenog lica,
5. odluku o promjeni pravnog oblika i organizovanju postojeće MKO u MKF,
6. prijedlog statuta, koji obavezno sadrži sve elemente iz člana 6. Odluke o uvjetima i postupku izdavanja i oduzimanja dozvole za rad i drugih saglasnosti mikrokreditnim organizacijama (u daljnjem tekstu: Odluka),
7. podatke o stručnim kvalifikacijama (diploma) i radnom iskustvu za članove upravnog odbora, direktora i izvršnih direktora MKF ako su predviđeni statutom i izvode iz kaznene evidencije za ova lica,
8. spisak organizacionih dijelova, sa naznakom dijelova koji su upisani u nadležni registar i koji nisu upisani u isti, te podacima o datumu početka rada, adresi i ovlašćenom licu,
9. revidirane godišnje finansijske izvještaje za posljednje 3 (tri) poslovne godine, te finansijski izvještaj koji u momentu podnošenja zahtjeva nije stariji od šest mjeseci, a u slučaju da finansijski izvještaji nisu revidirani, bilanse stanja i bilanse uspjeha za navedene periode,
10. strateški plan MKF za prve 3 (tri) godine poslovanja sa naznakom namjere ulaganja i prijenosa imovine za osnivanje novog mikrokreditnog društva (u daljnjem tekstu: MKD), ako ista postoji.

III. POSTUPAK IZDAVANJA DOZVOLE ZA RAD

Član 3.

FBA po prijemu zahtjeva postojeće MKO za izdavanje dozvole za rad iz ove Odluke vrši obradu istog, utvrđujući usklađenost zahtjeva i priložene dokumentacije sa zakonom i ovom Odlukom.

FBA može kao dodatne mjere:

- obaviti razgovor sa predstavnicima postojeće MKO,
- izvršiti kontrolu na licu mjesta,
- tražiti dopunu i drugu dokumentacije po potrebi,
- tražiti provjeru ili potvrdu finansijskih podataka baziranih na trenutnom i prethodnom stanju.

Član 4.

FBA o odobravanju ili odbijanju zahtjeva za izdavanje dozvole iz ove Odluke odlučuje rješenjem koje donosi u roku od 60 dana od dana prijema urednog i potpunog zahtjeva.

FBA može odbiti zahtjev za izdavanje dozvole u slučaju da nije ispunjen neki od uvjeta iz člana 22. tač. 1., 2. i 3. Odluke.

FBA može oduzeti dozvolu MKF u slučaju da postoji neki od razloga iz člana 26. Odluke.

Podnosilac zahtjeva dužan je za izdavanje rješenja platiti naknadu utvrđenu posebnim zaključkom FBA, a u skladu sa Odlukom o naknadama koje mikrokreditne organizacije plaćaju Agenciji za bankarstvo Federacije BiH.

Član 5.

U slučaju da podnosilac zahtjeva nije uz zahtjev dostavio svu potrebnu dokumentaciju ili informacije FBA može tražiti dopunu zahtjeva i odrediti rok za istu.

Ako podnosilac zahtjeva ne dostavi tražene dokumente ili informacije u propisanom roku, FBA će zahtjev odbaciti rješenjem kao neuredan.

Član 6.

Rješenje FBA je konačno i protiv istog se može pokrenuti upravni spor tužbom pred nadležnim sudom.

IV. PRIJELAZNE I ZAVRŠNE ODREDBE

Član 7.

Postojeće MKO dužne su FBA predati zahtjeve sa kompletnom dokumentacijom za izdavanje dozvole za rad iz ove Odluke najkasnije do 12.8.2007. godine.

Član 8.

Postojeće MKO koje ne dobiju dozvolu za rad FBA i ne podnesu prijavu za upis MKF u nadležni registar do 12.10.2007. godine, prestaju sa radom i brišu se iz registra nadležnog organa.

Član 9.

Kao osnivač MKF može se registrovati samo osnivač postojeće MKO, bez prava vlasništva u kapitalu MKF.

Organizacioni dijelovi postojeće MKO postaju organizacioni dijelovi MKF.

Član 10.

MKF koje se upišu u registar fondacija, dužne su uskladiti visinu kapitala sa odredbama Zakona o mikrokreditnim organizacijama u roku od 3 (tri) mjeseca od dana upisa u registar fondacija, te održavati istu sve dok imaju dozvolu FBA.

Član 11.

Ova Odluka stupa na snagu osmog dana od dana objavljivanja u "Službenim novinama Federacije BiH".

Broj 01-1-393-5/07
14. marta 2007. godine
Sarajevo

Predsjednik Upravnog odbora
mr. **Eldar Arnautović**, s. r